

DISPUTATIO MEDICA INAUGURALIS  
DE  
**IDIOSYNCRASIS**

Q V A M

DEO PROPITIO

CONSENSU, ET AUTORITATE AMPLISSI  
MEDICORUM IN ILLUSTR. ACAD. JULIA  
ORDINIS

P R Æ S I D E

V I R O C L A R I S S I M O

DN. FRIDERICO SCHRADERO


MED. DOCT. EJUSDEMQUE ET PHILOSOPHI  
NATURALIS PROFESS. PUBL. ET ORD. FA-  
CULTATIS MEDICÆ HODIE DECANO  
SPECTABILI

DN. PATRONO, ET PRÆCEPTORE SUO OMNI  
HONORIS, ET OBSERVANTIÆ CULTU ÆTA-  
TEM PROSEQUENDO

**PRO LICENTIA**

SUMMOS IN ARTE MEDICA HONORES, ATQUE  
PRIVILEGIA DOCTORALIA RITE CON-  
SEQUENDI

PUBLICÆ, ET SOLENNI DISQUISITIONI SUBJICIT  
IN MAGNO JULEO


DIETERICH VALENTIN ramer/

Medicus Seehufanus,  
HORIS ANTE ET POMERIDIANIS  
A. d. xix. Jun. A. MDCXCVI.

HELMESTADII,

Typis GEORG-WOLFGANGI HAMMII, Acad. Typogr.










## *Thesis I.*

Uamvis, quod magnopere dolendum, ita jam in re Medica comparatum sit, ut quivis, etiam infelicissimo Mularum partu natus, quivis vera Artis peritia destitutus nugi vendus circulator, Medici nomen sibi arroget, nullique plures, quam arduo Medicorum muneri sese ingerant; longam tamen, & arduam esse Medicam Artem, & non nisi sudore multo acquiri, vel id documento est, quod & in minimis circa corpus humanum versatum esse deceat, quicumque veri Medici laudem sibi acquirere studet. Non enim jam dicam de morbo ipso Medico probe semper inquirendo; non de morbi causa exacte eidem investiganda; non de morbi ætate, & reliquis, quæ divinus Senex, libro de affect. in omni morbo attendenda præcipit; siquidem his omnibus debite non præcognitis, scopum Arti præfixum attingere neutiquam licet, cum contra, graviter sic errari, & cum famæ, & ægrotantis irreparabili damno impingi posse, nemo non videat. Saltem id hac vice asseram, restare adhuc alia quædam, medenti, antequam ad medendum se accingat, cognoscenda: quorum certe considerationem si quis neglexerit, non in curandis solum plurimis morbis frustra erit, sed non raro etiam, ubi solari cupiet ægrotantem, eundem magis lædet, & ubi salutare nitetur applicare remedium, toxicum propinabit.



## II.

Minimè etenim sufficit ad curationem ritè instituendam, morbum ipsum intellexisse, sed præterea multum huc quoque facit cognitio ægrotantium ætatis, imprimis ad dosin debitam medicamentorum determinandam. Sic respiciendus pariter venit sexus, cum teste experienciâ, & huic innitente Hippocrate, de morb. mulier. lib. i. longè aliter affectus virorum, & mulierum morbi sese habeant, utpote in quibus cum partibus plurimis consentiens uterus sollicitè attendendus, nisi sterilem omnino eorundem curam suscipere quis velit. Et quantum non anni tempus bene consideratum, ad multorum morborum tum prognosin, tum curationem, momenti affert? Perspiciet id facile, qui febrium intermittentium extirpationem non semper eandem, & æquè facilem esse cognovit. Accedit his temperamentum; ubi sanè, an cacochymicus æger sit, an biliosus, an plethoricus, scire omnino expedit. Quibus omnibus denique Consuetudo, & Idiosyncrasia quoque ægrotantium accenseri merentur; hæc enim non raro sola, quid agendum, quidque omittendum, ostendit.

## III.

Scilicet, est Idiosyncrasia illud, quod, si ullum aliud, medelam sæpissimè dirigit, & variat, illa interdum suadens, quæcunque vulgaris usus dissuadet, & contra dissuadens, quæcunque usus apta judicavit. Mira hæc quidem videri possent; sed quorum veritatem mecum agnoscat, quicumque in Praxi aliquo modo est versatus, &, quid in ea contingat, sedulus observavit. Cumque diutius huic contemplationi, quæ  
fructu



fructu neutiquam destituitur, immorari, operæ præ-  
tium duxerim, species Idiosyncrasiæ hujus potiores  
paulò dilucidius exponere, constitui: Deum ex animo  
venerans, velit Is propitius huic labori meo adesse,  
quò cœptam telam, tum ad Ipsius Divini Nominis  
gloriam, tum ægrotantium emolumentum expedi-  
re liceat.

#### IV.

De Idiosyncrasiis igitur acturus, per illas, vel vi  
vocis id indicante, propriam intelligo, specialemque  
corporum, seu individualement illam, naturâ infitam  
proprietatem, quâ quidam v. gr. aliàs innoxia, imò  
sæpe valdè salutaria ferre nequeunt, quidam noxia fe-  
runt, aut alia ratione â communi hominum natura  
differunt.

#### V.

Videntur, quæ pasim ab Autoribus circa hanc  
rem annotantur, ad tres potissimum classes commo-  
dè reduci posse; dum alii 1. certas res planè averfantur,  
vel nimium appetunt: alii 2. quibusdam rebus vel  
parum, vel nimis alterantur: rursus denique alii 3.  
certam corporis functionem, vel auctam, vel immi-  
nutam, vel depravatam habent.

#### VI.

Quod primam igitur Idiosyncrasiarum speciem,  
qua nonnulli certas res planè averfantur, attinet, per  
omnes omnino sensus externos eadem se diffundere  
deprehenditur. Atque sic, ut â sensuum nobilissimo  
initium capiamus, multi certarum rerum visu ma-  
gnopere offenduntur: qualis fuit ille, quem describit  
Henr. ab Heer, in Obs. Medic. oppid. rar. ultima, qui



visâ angvillâ lipothymiâ gravi correptus ; item aliûs vir militaris , quem ad conspectum phlebotomiæ epilepsiam incurrisse , Philip. Salmuthus Cent. 2. O. 73. memorat. Quod idem egregiè confirmat , quando strenuos , & bellicosos Duces , sectam venam intuentes , animo defecisse , perhibet Jos. Quercetanus Diæt. suo Polyhist. Sect. 1. cap. 8. ubi pariter magni cujusdam Principis meminit , qui facile adeo aspectu alicujus muris in cubiculo degentis perterritus , ut se ipsum vix continere potuerit. Sic strenuum militem , quem rutæ aspectus in fugam vertit ; item Mantuanum nobilem , qui erinaceum intueri non sustinuit ; nec non ipsum Avenzoar , Medicum , quem sola vulneris inspectio in animi deliquium deduxit , affert Marc. Donatus , in hist. Med. mirab. l. 6. c. 3. quendam gallum gallinaceum non ferentem ; & alium vetulæ conspectu enectum , Joh. Schenkîus â Grafenb. lib. 7. de Idiosyncr. adducit. Qualem & fuisse Scaligerum , cressonibus visis horrore perfusum ; nec non unum ex ejusdem liberis , brassicam abominantem , in Exercit. ejus 153. ad subtil. Cardan. videre est. Et spectant huc illi , qui strictum ensẽ tolerare nequeunt : qualis erat Jacobus , Angliæ Rex , qui proin equites non nisi averso â gladio vultu creare valebat ; unde proverbium reliquit :

Rex erat Elisabeth , nunc est Regina Jacobus. Quin , quod magis mireris , exemplum prostat viri generosi , qui nec gladios , nec hastas metuit , qui tamen conspecto acus acumine protinus animi deliquium passus ; ceu ex Viri Excellentissimi propria observatione me notâsse , memini.



Progredimur ad reliquos sensus ; inter quos auditum porrò Idiosyncrasiis suis obnoxium animadvertimus. Sic quædam fœmina, coaxatu ranæ audito, lipothymiam incidit, nec nisi vino generoso sumto ad se rediit, teste Henr. ab Heer. in Obs. sua ultima. Alia campanæ sono, aut voce aliqua sonorâ perceptâ animo lieta, quæ tamen remediis restituta, referente eodem Henr. ab Heer. l. c. Rursus alii audito tonitru mirum in modum percelluntur : qualis fuit Cæsar Caligula, quem scribunt usque adeò, vel mediocriter intonante cœlo, formidine quassum, ut subterraneas latebras, amenti similis, percontaretur. Et quidem notius, quam quosdam gallorum cantum, quosdam certarum rerum stridorem, quosdam ferreamentorum tinnitum cane pejus, & angue execrari? Cujus generis & famosum illum Cæsareum Ducem Wallensteinium extitisse, verosimile est. Quemadmodum singularis quondam affectio erat Aicanoris, qui ad convivium deductus tiliarum cantum de nocte sine magna animi commotione non sustinuit, quem tamen interdium optimè perferebat ; teste Hippocrate l. 5. de morb. popul. Nec de Gustu alia ratio est. Observamus enim passim, quæ plurimorum palato arrident, eadem à nonnullis prorsus respui alimenta. De caseo, & lacticiniis pervulgata, & quotidianæ experientiæ innixa res est, adeò, ut caseum non modò comestum, sed & solum ejusdem odoratum venenum evasisse, observatum sit. Et vid. de lacte Petr. Borellus Cent. 4. Obs. 61. Marc. Donatus, hist. medic. mirab. cap. 6. aliique. Quemadmodum nec illorum exem-



exemplis destituimur, qui ab omni cerevisiæ, & vini usu abstinere. Sic fuerunt, qui Lactucam declinârunt, teste Aldrovando, in hist. monstr. alii, quibus ova formidinem incusserunt, adeò, ut solus eorum contactus bullas in corpore excitârit, referente Borello in Epilog. Cent. 4. Obs. Sunt porrò, qui cancroso- dio prosequuntur, docente id quotidianâ experienciâ. Sunt contra, qui canculos amant, & cæterorum animantium carnes fastidiunt; quemadmodum talem, qui nullo vesci poterat animali, sanguine prædito, canculos autem, & alia fluviatilia exanguia in deliciis habebat, recenset Salmuthus Cent. 2. O. 100. Sic Comitem generosum, qui oleum olivarum, & omnia cum eo parata edulia recusavit, recenset Horstius, annor. ad L. Lemn. integram familiam, cui malorum odium innatum, Joh. Schenklius à Grafenb. l. 7. de Idiosyncr: Virum quendam, qui nullum obsonii genus sale permixtum comedere potuit, Marantha in Method. cogn. simpl. lib. 3. c. 13. & contra juvenem, qui dulcia omnia rejecit, & acidis potius, falsis, & austeris gustui suo blanditus fuit Lusitanus Curat. 60. Cent. 6. Saltem memorabile, & admiratione dignum, quod Bryernus lib. 1. de re cib. c. 24. de Normanno rustico refert, qui nec panem, nec carnes, nec pisces, nec caseum unquam degustavit, sed sola ova in cibum admisit, unde & cognomen mustelæ, animalis ovorum avidissimi, ei à vulgo impositum. A quo non multum discrepavit Canonicus ille quadragenario major, qui solis pul- tibus, quibus in cunis alebatur, contentus vixit, & so- lam putealem bibit aquam, teste Henr. ab Heer. in obs. ultim. Et quid de olfactu dicendum? Videmus sanè  
& hunc



& hunc per Idiosyncrasiam malè dispositum averfari res aliàs gratissimas. Quis rosas, & rosacea nonnullorum naribus & naturis inimica crederet? Et tamen experientia id abundè confirmat. Sic Monachus quidam, teste Amato Lusitano, quoties rosæ odorem persentiscebatur, animi deliquium patiebatur. Et nobilis quidam Anglus, referente insigni Boyleo, à rosarum odore adeò abhorruit, ut cum nonnemo antipathiam hanc experturus, illius dormientis genæ rosam imposuisset, pustulas statim in eadem exortas deprehenderet. Quin Episcopum rosarum fragrantia extinctum scribit Mart. Cromerius, de reb. Polon. l. 8. Quemadmodum etiam Medicum quendam rosâ, quam manu sua gestabat, ægræ suæ valde nocuisse, ex ore Excellentissimi Dn. Præfidis, Præceptoris mei ætatem devenerandi, quondam notâsse memini. Scilicet adeò id verum, ut & rosata quocunque modo talium hominum corporibus applicita usus noxia declarârit. Quod quidem experienciâ Medicâ insignis Thoneus exemplo virginis, quæ ex melle rosato per clyisma injecto lethalia incurrit symptomata, lib. 1. Obs. Sect. de Febr. Interm. egregiè commonstrat. Quid porro notius, quam moschum, & ambram nonnullis, foeminis præsertim, Vatiniano damnari odio? aliis ad-aversari odorem camphoræ? qua de re quotidiana satis testatur experientia. Sic quidam fraga ferre nequeunt, teste doctissimo Velschio ad Rumler. Obs. 69. ubi pariter ipsius Rumleri, odore mororum rubi Idæi lipothymici facti, exemplum recensetur. Et ut dantur foeminæ, quæ, sive gravidæ existant, sive non gravidæ, à foetoribus vehementer abhorrent, & prava iis perce-



ptis experiuntur symptomata; de quibus habet Plinius hist. nat. l. 7. c. 7. sic contra dantur plures, quæ svaveolentia, & odorifera omnia execrantur; cujus rei etiam notabile imprimis affert exemplum Salmuthus Cent. 3. O. 71. in servo carnificis, qui pharmacopolium ingressus, & unguentorum, aliorumque pretiosorum fragrantiam naribus percipiens, animo lictus, cumque balsama â pharmacopœi ministris ipsi inuncta malum potius augerent, nonnisi ad cloacam â superveniente carnifice deductus restitui potuit: ceu idem ferè de rustico testatur L. Lemnius, de occ. rer. mir. l. 2. c. 9. Quibus accenseri possunt, qui peculiarem cum canibus, cattis, & muribus antipathiam foveant, adeò, ut sola eorum, vel latentium, præsentia lædantur; qua de re legi merentur. P. Borell. Cent 4. O. 61. & Henr. ab Heer. in Obs. ult. Tandem, ut discursum hunc finiamus, nec Tactus propriè dictus ab hujus Idiosyncrasia efficacia prorsus est immunis. Reperiuntur quippe, qui auram commotam ferre nequeunt; ceu hujus rei exemplum adducit Salmuthus Cent. 3. O. 7. in paralytico, qui, quoties cubiculi fenestræ ventorum vehementius concuterentur, toties lipothymicus factus; quam tamen proprietatem pro malo in morbis signo ibidem agnoscit. Nec desunt Observationes illorum, qui manualementum rerum contactum horrent: id, quod in quodam amicorum me notasse memini, qui vestimenta holoserica, quod molli adeo superficie essent prædita, contrectare non audebat.

## VIII.

Contrarium planè occurrit in iis, qui nimio certarum



tarum rerum appetitu feruntur. Ubi quidem non nobis sermo de illis, qui occasione pravorum in corpore hærentium humorum, concurrente præsertim quodam imaginationis vitio appetitum talem incurrun-; hi enim, ut morbum Picam, vel Malaciam vulgò dictum, contrahunt, sic vel sponte iterum, vel debito Medicaminum usu eo liberantur, nec hujus proin fori sunt. Potius cum illis nobis hîc res est, qui â teneris unguiculis, & per totum vitæ decursum appetitum certis quibusdam rebus mancipatum habent, nec ullam proin individualis suæ proprietatis curam admittunt. Sed nec horum exempla rarò occurrunt. Sic puella adulta â prima infantili ætate calce parietum, & fragmentis laterum delectabatur, referente Ettmullero Prax. l. i. c. i. Nec parvam meretur admirationem puer ille Svinfurtensis, sex annorum, murarii filius, qui â tempore ablactationis statim creatam, arenam, pulverem ex angulis hypocaufti collectum, vel ex calceamentis excussum, voravit, nec vel minis, vel verberibus, vel etiam adhortationibus coerceri potuit; adultior autem factus, carbones, lateres, carnem crudam, calcem de parietibus, calcem vivam, lychnos cum ellychniis, corium, ossa, filices, varii generis insecta, sine noxa devoravit, & præter caseum, panem, & aquam cibos omnes fastidivit: juxta M. A. N. C. dec. i. an. i. Obs. 83. it. an. 3. Obs. 179. Verum absurdorum hic, & â natura hominis prorsus alienorum est appetitus. Alii esculenta quidem, sed nimia quantitate eorum usum exigunt. Unde non singulos solum nimio tali quorundam desiderio teneri videas; qualis fortè fuit Clemens VII, Pontifex Ro-



manus, quem usque adeò suugorum quotidiano usui deditum fuisse, legimus, ut ad defectum horum præcavendum, eorundem comestationem, publico edicto, per universam ditionem, prohibuerit; quâ tamen effreni instinctui facta licentiâ morbum sibi lethalem, & Curtio Medico planè incurabilem accersivit. Quin imò & integras familias plus æquo, sive solidorum, sive liquidorum quorundam amore flagrare, constat. Nec excludi hac classe possunt, qui naturali proprietate ducti certarum rerum, sive aspectum, sive odoratum, sive tactum deperditè magis amant; quemadmodum v. g. reperiuntur, qui corii, & similium odorem cæteris omnibus vel suavissimè olentibus præferunt.

### IX.

Pergimus ad secundam Idiosyncrasiarum speciem: ubi, quod primò iterum concernit illos, qui certis rebus parum alterantur, exemplis pariter non destituimur. Prodeant in scenam, qui vel fortissima, aliisque tanta dosi lethalia planè drastica sine ulla noxa assumunt. Sic quendam hellebori totos manipulos sine noxa devorantem, Theophrastus de hist. plant. l. 9. c. 18. alium scammonium, idque ad drachmam unam, atque alteram, imo unciam integram, citrà alvi laxationem ingerentem, Fallopius tr. de simpl. purg. c. 48. rursus alios, qui nullo eccoproptico subigi potuerunt, quibus tamen exhibita propriorum unguum præsemina & vomitum, & secessum concitârunt, Henr. ab Heer. in Obs. ult. recensent. Nec ignotum exemplum rustici, qui, cum adhibito in prægrandi dosi succo Esulæ nostratis, ex voto purgari non potuisset,



set, ad Medicum accessit, utque fortius sibi præscriberet evacuans, rogavit. Et collegit talia plura Brasav. in exam. simpl. pag. 236. Est fanè incredibilis complexionum, maximè in purgantibus adhibendis, differentia, quam nisi vel indicio ægri, vel usu resciveris, non ex physiognomia, non ex corporis habitu, non aliunde facile cognoscas. Neque hic externo corporis robori, aut soliditati temerè fidendum: toties enim accidit, quadratos homines, & vastissimi habitus, lenissimis laxantibus vehementissimè purgari; cum contra alii violentissima quæque nihil morarentur. Atque tales multum Medicis faceffunt negotii, cum si summam, consuetamque dosin superes, non semper pro voto res succedat, illi verò, qui levibus quibusque moventur, ad justam purgantis dosin in hypercatharsin, animique deliquium facile prolabantur. Venena, vel alia nimia dosi sumpta venenis non inferiora, ab aliis citra damnum subigi, possem exemplis plurimis evincere, nisi res nota esset. Quidam Opii dosi ingenti impunè utuntur; quemadmodum Vir ille, qui singulis diebus tres opii laminas, 10 drachmas, & amplius pendentes comedit, & tamen aptissimè, & doctè de omnibus disputavit, teste Garzia ab Orta, Aromat. Ind. hist. l. 1. c. 4. Et notatu dignum, quod de vetula Galenus refert, illam cicutam, at, quantum venenum! præ omnibus appetitam, sine notabili damno devorasse. Quo pertinet illa apud Albertum M. puella Coloniensis, quæ in quotidianum cibum araneas vertit. Notissimum verò de Mithridate, Ponti Rege, eum venenis adeò assuetum, ut tandem, cum iis interfici cuperet, necari non posset. Quamvis neque hoc de



talibus venenivoris negandum, remanere tamen in his, habituque corporum imprimi aliquas veneni proprietates, & sanguinem humoresque illo inquinari, ut indiciis quibusdam interdum id se exerat, adeò, ut rem miram de puella venenis educata referat Avicenna, eam nempe omnes sibi appropinquantes vitâ privâsse. Sed fides esto penes Avicennam.

X.

Quemadmodum verò hi fortissimorum etiam assumptorum efficaciam eludunt; sic alii temperamentum fovent omnino contrarium, & à certis quibusdam, vel alimentis, vel medicamentis nimiam mutationem suscipiunt. Referas huc pariter, quibus Camphora generosum nimis est remedium; de quibus notabile in hysterica muliere vehementer ejus usu læsa habet exemplum Aug. Thonerus Obs. l. 3. de morb. uter. c. 3. Sic à certarum rerum comestione morbos incurrun-  
t alii: qualis fuit Joh. Heurnius, qui, id ipse de se commemorans, quoties piper, vel raphanum comedit, colicis doloribus atrocissimis cruciari solitus; quales & sunt omnes, quorum observationes passim occurrunt, qui certa alimenta, quibus vel maximè delectantur, assumere nequeunt, quin protinus Ventriculi, primarumque viarum incommoda inde sentiant. Et quot non porrò reperiuntur, qui alvum plus justo mobilem, & ad nutum obsequentem habent? adeò, ut quidam lenissimis etiam purgentur jusculis: quemadmodum de matrona jure carnis bubulæ sufficienter laxata; item de viro quadragenario, à capi, vel gallinæ jure idem experto, qui tamen vitellis ovorum coctis promptè iterum alvum firmavit, id confirmat  
Henr.



Henr. ab Heer. in Obs. ult. Sic, quæ in plerisque astringunt, in nonnullis alvum movere deprehenduntur: cujus rei, cum in Belgio degerem, evidens certè suffragium ex Viri Excellentissimi ore me percepisse, recordor, qui in quibusdam decoctum balauſtiorum, gallarum, ſeminis Sumach. alvum laxaſſe, propriâ experientiâ affirmabat. Idem de Meſpilis, fructibus ſaporis astringentis, nonnullos homines purgantibus, de caſtaneis, & aliis adſtringentibus habet Cl. Pechlinus, Observationum elegantiffimarum LXI, lib. II. quam obſervationem pulchrè ita orditur: *Medicinæ difficultas plurimum inde augetur, quod, ut ſingulis corporibus peculiaris inſita eſt temperies, ita etiam non quævis promiſcuè, ſed alia atque alia pro illa conditione admittant medicamenta; atque ipſum hoc tam abditum eſt, ut non antè certi ejus eſſe poſſimus, quàm experimentum rei fidem, & quod in ea eſt peculiare, manifeſta verit. Varia quotidie, & paradoxa objicit experientia, quæ, ſi ad rationis trutinam exigantur, inania videntur, ac falſa, ſenſuum tamen teſtimonio veriffima.* Hæc Pechlinus. Alias ad hanc claſſem quoque non injuriâ referas viduam illam, quæ, cum ad roborandum ſtomachum unum Elixiris ſtomachalis, ob dulcedinem Vini Gallici ſpiritu temperati cochlear ebibiſſet, aliquoties inde purgata fuit, narrante id Mich. Lyſero Obs. Cultr. Anat. annex. n. 5. Quin, quod certè mireris, ſunt, qui ſolo medicamentorum odore purgantur: cujus generis fuit Medicus quidam Lipſienſis, qui corpus evacuaturus, pharmacopolia ingrediebatur, olfactisque Electuariis purgantibus, ibidem recens paratis, non aliter inde, atque alius pharmaco uſus, dejecit, teſte



teste Salmutho cent. 3. Obs. 8. Quibus meritò addo  
Viri cujusdam, ex cujus propria relatione hæc habeo,  
Idiosyncrasiam, qui hederâ terrestri manu fricatâ, ea-  
demque naribus admotâ, pro lubitu 2. vel 3. sibi po-  
test concitare sedes, ad febres pariter non parum hinc  
proclivis. Nec incommode huc mulierem illam tran-  
scribas, cujus in Act. Hafn. fit mentio, quæ audito to-  
nitru fragore protinus alvum laxam experta; nisi ab  
incusso hinc metu id evenisse dixeris. Sic ridicula  
quondam proprietas fuit Vasconis equitis, qui perce-  
pto phormingis sono, urinam continere non potuit,  
scribente Scaligero Exerc. 344, ad Cardan.

### XI.

Sed ad tertiam nunc Idiosyncrasiarum classem,  
quæ ratione functionum evenit, devolvimur. Ubi  
quidem illud ante omnia præmonendum, utut ad  
morbos potius illa pertinere videatur, propterea quod  
actionum læsionem involvat; teste tamen multiplici  
experientiâ, naturam in certis subjectis eidem adeo  
assuescere, ut, quod præternaturale in aliis audit, in  
his naturale evadat; cujus proin ratione habita in hunc  
individualium proprietatum censum referri illa me-  
rebitur. Quod quidem per singula eundo constabit  
rectius. Et facile, quod functiones auctas spectat, id  
confirmabit exemplum ventricosorum, obesorum,  
eorumque, in quibus nutritio justo liberalius proce-  
dit: quales utut sæpius non parvo cum incommodo  
vivere observentur, interdum tamen sic satis bene  
valent, & cæterarum functionum integritate vel sa-  
nisimis fastum faciunt. Et quid in fœminis non con-  
tingit? quæ ob laudabilium humorum affluxum ni-  
miam



miam interdum lactis copiam fundunt. Erat certè ex his Galla illa, quæ, teste Borello Cent. 3. O. 28. copiosum adeò quotidie lac emittebat, quantum non solum lactandis duobus infantibus, verum etiam, pro conficiendo ad curam phthifici butyro sufficebat. Ast utinam non à quibusdam observationum collectoribus, tu rerum inauditarum tumore, & incredibilium strepitu in maiorem admirationē Lectores adigerent, talia interspergerentur, quæ prudentū hominum fidem excedunt: Alias huc pariter spectant illæ, quæ menstruā evacuationem auctam experiuntur: quarum aliæ stato mensium tempore copiosissimum sanguinem profundunt, quod in succulentis, & plethoricis frequentissimum observatur; aliæ & gestationis suæ tempore excretionem hanc retinent, quod aliquot relationibus confirmat Velschius, Obs. Reusn. 99. rursus aliæ ætatis ratione modò citius, modò diutius menstruantur; ceu fluxus hujus in Virguncula undecimo ætatis anno erumpentis, & contra in fœmina ad 76. durantis exempla recenset Balth. Timæus à Guldenk. l. 4. O. 13 & 14. Quin, quod puellæ quadrimæ menstrua describat Nicol. Tulpius: quem vid. Obs. l. 3. c. 36.

## XII.

Et hætenus de habentibus functiones auctas. Quot non contra occurrunt Observationes eorum, qui certā quandam corporis functionem imminutam sentiunt, cætera sanissimi? Sic sunt, qui rarò alvi beneficium experiuntur. Qualis certè proprietas matronis illis contigit, quæ cætera sanissimæ, & quotannis uterum gerentes, nunquam, nisi vigesimo die, vel serius alvinas feces deposuerunt; nec non sacerdo-



ti cuidam religioso, qui post vigesimum demum & quartum diem naturæ requisita persolvit, idque à puero : quorum exemplorum meminit Henr. ab Heer. Obs. ult. quibus paria recenset Salmuthus Cent. 2. O. 65, & 98. Sunt porro, quibus alia humoris excernendi excretio vel imminuitur, vel planè aboletur: cujus rei exemplum præbuit Medicus ille Milhavenfis, qui temperamento utitur pituitoso, & obeso præditus, nullum vel sputum, vel mucum ejecit unquam, teste Borello Cent. 2. O. 68. nec non vetula illa apud G. H. Velschium, cujus meminit Obs. Reusn. 99. quæ 16. liberos enixa nunquam menstruorum fluxum passa, nisi quod purgamenta à partu prodirent. Sed nec ista in alia prodiisse, à celebri quodam Italo Medico observatum, ibidem legitur. Nec iniquè huc illos trahas, qui in ingestione, ut in egestionem isti, deficiunt. Et referri huc quodammodo possent, qui, cum cætera omnia assumere valeant, pilulas tamen, easque minimas, & ubi vel maximè volunt, deglutire nequeunt; qua de re quotidiana testatur experientia. Saltem classe hac excludi non possunt, qui ab esculentorum, & potulentorum usu sine notabili vitæ, & sanitatis dispendio diu abstinuerunt. Quibus certè annumerandus Vir ille, cujus meminit Borellus l. supra cit. qui 8. dies sine potu transegit, & mediis sub Caniculæ ardoribus filicibus ori insertis sitim fefellit: qualem & fuisse fœminam Coloniensem legimus, quæ interdum per 20. sæpe numero etiam per 30. dierum spatium ab omni cibo & potu abstinuit, quam ex Alberto M. citat Quercetanus Diæt. Polyh. sect. 2. c. 4. Sed harum non modò mirabilium, sed prodigiis



giis similibus observationum veritatem tueantur Auctores. Est autem casus memorabilis, quem proponit eruditissimus, & fide dignissimus Velschius Obs. Med. Episagm. 37. Planè autem singulare, & insuetum est, quod de puella Conflanensi per annum integrum, & de alia Helvetica ultra triennium sine cibo, & potu victitantibus; nec non de quibusdam per omnem vitæ decursum nunquam vel sitientibus, vel bibentibus, utentibus interim multis cibis sale confectis, & exsiccatis laudatus Quercetanus l. c. Athenæus l. 2. c. 2. alii-que memorant. Quibus omnibus demum annumeres familiam illam Leodicensem, in qua cunctis utriusque sexus nares calore prorsus destitutæ semper frigebant, de qua legi meretur Henr. ab Heer. Obs. ult.

### XIII.

Nec eorum defunt exempla, qui certam corporis functionem depravatam, & à communi naturæ lege alienam habent, cætera non minus sani, quam pisces. Quid non in ciborum in ventriculo retentione evenit? ubi quidam cibum deglutitum, antequam in stomacho debitè retineant, pecudum more ad rumen revocant: qualem in condiscipulo suo describit Salmuthus Cent. 1. O. 100. in alio Velschius Obs. Med. Epis. 36. Quid non in fecum alvinarum propulsione? & spectat notabilis huc imprimis de Viro generoso historia, qui multos annos ita vixit, ut sub meridiem pridianum prandium revomeret, retentis accuratissimè omnibus recens ingestis, postridie illa ut hesternæ egesturus, & putidissima quidem, nec ab alio stercore differentia, teste sæpius memorato Henr. ab Heer. obs. ult. Sic ratione menstruæ evacuationis in sexu sequiori idem de-



prehenditur; dum modò per anacatharfin , modò per vomitum , modò per mammarum foramina , modò per verticem eandem cum euphoria contigisse constat : ceu Riverius Cent. O. 63. Timæus â Gul. denk. l. 4. cas. 12. Pechlinus l. 1. O. 38. & Kerkringius Obs. 85. id confirmant. Taceo , quæcunque de nonnullis scintillas ex artubus evibrantibus, Bartholinus Cent 3. hist. anat. 70. Borellus Cent. 2. O. 69. & Cent. 4. O. 43. de aliis noctu sine lumine clarè videntibus , insolitaque videndi acie præditis, Corn. Gemma l. 1. Cosmogr. c. 7. de olfactu quorundam exquisito , Campanel. de Sens. rer. lib. 3. c. 8. de aliorum velocitate , & fortitudine prodigiosa , Plinius hist. nat. l. 7. c. 20. de aliis alii referunt; sufficitque mihi indicâsse potissima, ad quæ, tanquam ad communem fontem cætera commodè reduci queant, quæ si enarrare singula vellem , materiæ ubertatem non mihi, me tamen illi defuturum lubens confiteor.

#### XIV.

Et si autem, quò magis jam ab aliquo tempore, dum materiam pro hac dissertatione colligo, illam inspicio, eò intricatius, pluribusque difficultatibus involutum hîc esse causarum scrutinium, sentio; conabor tamen aliquid, & , quod ordo nunc exigere videtur, ad propositarum Idiosyncrasiarum ætiologiam me conferam, inque dictis phænomenis ex causis explicandis vires meas qualescunque porrò experiar. Unde, quod primam illam , quâ quosdam sensuum externorum certis subjectis magnopere lædi diximus , spectat speciem , illa , quæ est inter matrem & fœtum accurata connexio , hîc videtur supponenda. Non movebo  
nunc



nunc litigiosam illam, & diu in schola Medica agitatam  
controversiam , an foetus pars matris jure dicatur?  
Saltem hoc certum, & veritati quàm maximè congru-  
um, mirandam matri cum foetu esse partium harmo-  
niam, & resultare hinc functionum pariter miram in  
utroque conformitatem. Nec ineptè proin cum ce-  
lebri quodam Physico dixerim, imitari foetum in ute-  
ro positum motus, actionesque maternas: id, quod  
in sensus maternos afficientibus imprimis obtinet. Non  
mirum itaque, facta forti quadam per sensus externos  
in matre impressione, notabiliter lædi foetum. Hic  
enim, cum mollis adeò existat, & partes habeat facile  
diductiles, damnum hinc capere potest; quod quidem  
pariter vel ipsa mater incurreret, nî robustioribus il-  
la, & externis injuriis fortius resistere aptis gauderet  
membris In foetum itaque cum factæ impressio-  
*ἐνέργεια* potissimum redundet, videas hinc tot miran-  
dos imaginationis maternæ effectus, qui quidem inter-  
dum in bonam edito infanti partem cedunt, sæpius  
verò, imò sæpissimè eidem nocent, & modò partium  
quarundam defectum, modò earundem abundantiam,  
modò insolitam membrorum magnitudinem, confor-  
mationem, perversum situm, atque connexionem,  
modò ipsarum functionum læsionem ei inducunt; ceu  
innumera celeberrimorum Practicorum de his anno-  
tata exempla id abundè testantur, quorum recenset  
nonnulla Thom. Fienus, illo, quem de virib. Imag.  
scripsit, tr. quæst. 13.

## XV.

Quæ cum ita sint, proximam quidem primæ il-  
lius, inque omnimoda rerum quarundam aversione



sitæ Idiosyncrasiaæ causam ad singularem organorum  
sentiendi dispositionem, remotam verò ad horrorem  
matris adversam adeò dispositionem foetus sensoriis in-  
ducentem, referendam arbitrer. Notum lanè, gra-  
vidas mulieres delicatissima interdum fastidio profe-  
qui, & terreri rebus sæpe minimis, & rerum, ut sic  
dicam, umbris. Quod si igitur ad oblatum ejusmodi,  
sibi que adversum objectum de improvviso exhorrescat  
mater, facile inde fiet, ut motum, qui horrorem hunc  
peperit, in cerebro perceptum per filamenta ad uterum  
terminantia propaget, mobilibusque adhuc infantis  
nervulis eum ita imprimat, ut ad ultimam usque æta-  
tem ejusdem vestigia permanere necessum sit. Atque  
sic circa omnes omnino sensus singulares quasdam pro-  
prietates contingere, videbimus. Ubi quidem illud  
notatu dignum, magnam esse inter has sensuum ex-  
ternorum proprietates cognationem, magnam har-  
moniam, sic, ut quod unus averfatur, id facile respuant  
& reliqui: unde, qui nonnullarum rerum gustum  
ferre nequeunt, earum interdum nec conspectum,  
multò minus odorem tolerant. Quamvis neque hoc  
negem, fortem adeò interdum à matre foetui commu-  
nicari impressionem, ut peculiare inde sanguinis, &  
spirituum animalium emergat temperamentum: quod  
quidem in illis, qui cum felibus antipathiam foveant,  
clarum redditur, qui utut adversum sibi hostem nec  
videant, nec olfacere propriè dici possint, illo tamē præ-  
sente exhorrescunt, anguntur, sudant, & animi deliquia  
patiuntur, nulla alia de causa, quam, quod atmosphæ-  
ra bruti pulmones & cerebrum hominis ingressa mo-  
tum ibi toti ejus complexioni infensissimum excitet.

Et,



Et quid verbis opusest? dum ipsi in matribus partum prægressi casus fortuiti, qui propterea causæ occasionales rectè dici poterunt, nobis suffragantur. Quid enim v. g. Jacobo Regi tantam ensis formidinem incusfit, nisi à matre gravida de improvviso conspectus, præque oculis ipsius fugientem trucidans gladius? Observabunt idem & reliquæ, quæ Idiosyncraticostales in lucem ediderunt, mulieres, quæ ut plurimum percepti cujusdam, inque foetum derivati horroris rationem allegare poterunt. Quamvis & consuetudinis quædam hic sint partes; utpote quæ subtiles nervorum fibrillas in certas res penitus determinando naturæ interdum vices sustinet: id, quod servi carnificis suaveolentium proin odore magnopere læsi antea adducto exemplo sole meridiano clarius elucescit. Ubi de casei osoribus speciatim & illud addendum, Idiosyncrasiam horum à lactis materni in mammis coagulati suctu, unde fit, ut substantiam caseo similem nimis maturè gustent, commodè nonnullis deduci.

## XVI.

Quod de naturali quorundam aversione sic diximus, id de appetitu certarum rerum aliis contra ingenito contrario quodam modo prædicandum videtur. Ut enim in illa horror maternus foetui inducit dispositionem rei fastiditæ oppositam; sic contra in hoc gravidæ matris appetitus eidem crasin rei appetitæ conformem procul dubio impresfit; quam quidem crasin ipsum ventriculi fermentum, utpote in quo appetitus naturalis causa refidet, tum potissimum contraxisse verosimile est; sic, ut à certo demum in animo concepto alimento blandius eodem commoto, & sequente

hinc



hinc blandâ sensibilis stomachi tunicæ vellicatione, ejusdem quoque dein alimenti desiderium sequi, dicendum sit. Quod cum multis possum corroborare exemplis, mihi unum, quo appetitus hæc in foetum derivatio apertè constat, ex Cl. Tulpio subjunxisse sufficiat, qui Obs. Med. l.2. c.24. pro more suo eleganter ita loquitur: *Mulier Darentriensis imprægnata delectabatur tam impensè halecibus salitis: ut ante partum comederit mille, ac quadringentos. Attamen sine ventriculi offensa, ullo ve sanitatis dispendio. Fuit tamen ipsa bis noxia; in se, ac in infantem. In se, quod nequiverit refrænare immodicum hoc salsamentorum desiderium. In infantem verò, quod ipsius appetitum mancipaverit adeò strictè huic servituti: ut cum necdum posset verbis expetierit tamen ejulatu haleces, quibus se tam effusè dederat mater, plus æquo sibi indulgens.* Ubi & pravam interdum consuetudinem pariter supervenire, & appetitum determinare, & plurimum intendere, experientia testis est, juxta prov:

Quo plus sunt potæ, plus sitiuntur aquæ.

## XVII.

Sed progredimur ad secundam Idiosyncrasiarum speciem, in qua, & tertia quoque à nobis melioris ordinis causa constituta specie humorum consistentiam peculiarem, qualitates, certamque διαθεσιν, interdum per signa manifestam, sæpissimè verò occultio-rem subesse, arbitramur & hinc temperamentorum specialem, ac propriam in aliis tolerandis, aliisque excludendis diversitatem potissimum oriri. Hinc mirum non est, violentissima in corporis pituitosi saburra esse invalida. Hinc mirificæ ventriculi nostri sæpe sunt qualitates, ut, qui levioribus offenditur sæpe  
magis



magis, quàm durioribus cibis, & malè affectos frustra  
excruciari mollibus, & facillimè aliàs coquilibus vide-  
mus, non ante quandoque convalituros, quàm æquum,  
& dignum isto fermento alimentum invenerint. Adeo-  
que ordinariâ viâ incedendum in applicatione reme-  
diorum quoque hîc non esse, usus Artis persvadet, ne  
destruatur fermentum, quod servari debebat, sed huic  
sæpe adeò paradoxo æquanda potius diætâ, & metho-  
dus, non tam medici industriâ, quàm ingeniosi appeti-  
tus experimento reperiunda. Sed illos porrò in spe-  
cie, qui certis rebus parum alterantur, examini hîc sub-  
jicere, fas est. Ubi quidem, quod vel fortissima dra-  
stica sine noxa assumentes attinet, ad naturam horum  
explicandâ, ad pituitæ gluten aculeos humorum acer-  
rimorû in viscans, & bilem, ejusq; crasin, ac indolem po-  
tissimum respiciendum videtur. Notum siquidem ex  
Physiologicis est, bilem potissimum in corpore nostro  
esse humorem illum solventem, fundentem, &, quod  
vulgò dici solet, vim assumtorum à potentia in actum  
deducentem. Videmus hinc, ingesta plurima in ven-  
triculo hærentia non nocere, quæ verò, simulac in  
Intestinum duodenum, ubi bilis conjungitur, perve-  
nerunt, damna sua exerunt. Atque hinc est, quod  
divinus senex, ex oriente cane, & ante canis exortum  
perdifficiles purgationes esse, l. 4. aph. 5. asserat; quod  
nimirum præter magnam ab aere fervido factam hu-  
morum solutionem, ob nimiam quoque tum bilis effi-  
caciâ, & acredinem facile nimiae evacuationes suc-  
cedant. A bile itaque cum assumtorum formalis ope-  
randi ratio potissimum dependeat, facile inde erit col-  
ligere, inertî eadem, ac debita activitate suâ destitutâ,

D  
debi-



debitam quoque non sequi assumptorum solutionem ,  
nec proin illam , quæ per medicamenta intendimus ,  
corporis alterationem expectandam. Contingere ita-  
que potest , ut certa quædam subjecta foveant bilem,  
naturâ suâ non ita fluidam , non ita volatilem , ac in  
plerisque esse solet, quæ certè ejusdem qualitas per in-  
sequentem victus rationem, concurrente præsertim so-  
lidiori ipsarum partium naturâ, porrò intendi potuit.  
Ut proin non adeò mirum, si in his vel fortissima ca-  
thartica eum , quem in aliis obtinent, alterandi scopum  
non attingant. Utut neque hoc in dubium vocem, sed  
sedulâ circumstantiarum perpensione convictus am-  
babus largiar manibus , multum hic pariter conferre,  
si â teneris rei cuidam assuescamus. Et pertinent huc  
qui opium , & hujusmodi generis narcotica vorant :  
ad quorum hominum temperamentum licet climatis  
quoque constitutionem multum facere quis dixerit,  
maximas tamen & hic quoque consuetudinis partes ef-  
se probabile est. Quemadmodum & in illis , qui ve-  
nera in cibum verterunt, modò non rem omnem ad  
singularem corporis præparationem, unde illud acqui-  
rat vel facultatem veneni corruptivam , vel sanè illi  
familiarem referas. Atque sic priori quidem modò  
Mithridatem Regem confectiois suæ usu â venenis  
tutum, reliquos verò posteriori, contractâ nempe ve-  
nenorum assuetudine cum venenis similitudine , im-  
munes ab iisdem mansisse, dicendum erit. Vid. Hie-  
ron. Mercurialis, qui ubi tract. de venen. & morb. vene-  
nos. cap. 6. individualement hîc quorundam hominum  
constitutionem pro causa agnoscit , & quomodo ve-  
nera tales nutriant , inquit, id confirmat.



Quod verò in corporibus difficulter mobilibus humorum crasities, & tenacitas spicula acriorum corporum infringens, retundensque imprimis & quoque effœta, iners, crassa nimis bilis efficit, id in subjectis contraria dispositione præditis constitutio humorum illi opposita, bilisque fluida nimis, justo acrior, & penetrantior præstare deprehenditur. Videntur siquidem, quæ passim de his ab Autoribus annotata reperimus, id satis clarum reddere, copiosam admodum, & solito efficaciorẽ iisdem obtigisse bilem: unde non adeò mirum, si eadem ad motum per se jam satis disposita, ab accedente quodam in intestinis extrinseco, ad nimiam operationẽ deducantur. Et spectat huc illud, quod Henr. ab Heer, adduxit de viro quadragenario exemplum, cujus ex adjunctis circumstantiis resultans temperamentum l. c. porrò ita explicat : *cum ego, inquit, ei febrienti à cholera, maximisque, & diuturnis animi pathematis, erat enim litibus implicatissimus, 3. Syrup. ros. solut. simpl. uncias præscripsissem, quo die jam sponte sexies dejecerat, decies novies à Syrupò copiosè secessit : dabam illum syrupum, quia cum biliosissima, imò sinceram bilem excerneret, verebar, ne intestinis adbærens in dysenteriam, quã olim tantum non internecina laborârat, ipsum præcipitaret &c.* Unde apparet liquido, in hoc subjecto nonnisi bilem individualis illius proprietatis fuisse causam. Hinc pariter Heurnius, quem usu piperis, vel raphani Colicam semper incurrisse, diximus, hujus rei rationem nonnisi ad nativam bilem, calidorum accessione auctam, intestinaque acrius vellicantem refert. Nec mirum, in nonnullis saccharata, & reliqua



liqua dulcia tot creare incommoda : cognitissimum quippe est , plurimum acrimoniæ quorundam gingivis planè inimicum sub suo dulcore continere Saccharum , & dulcia referri inter illa , quæ facile bilescunt ; hoc est , fermentationes in corpore suscitant , & augment , unde tum tempore æstatis , tum in subjectis biliosis , & calidis , morbisque venenatis & contagiosis , nimium præsertim eorum usum Practici interdiciunt. Fermentatio siquidem est , quæ humores imprimis commovet , & pro gradu ebullitionis majore majorem molestiam affert , majoresque turbas in corpore facit. Atque hoc nomine Elixir illud stomachale , de quo in th. 10. diximus , quodque nimia dulcedine præditum , fuit , laxans evasisse , verosimile est. Nec obstat , quod , quæ in aliis astringunt , in hujusmodi corporibus contrarium effectum sortiantur : siquidem & hæc succum quendam fermentativum involvunt ; id , quod in certis fructibus pro diverso usu modò alvum constipantibus , modò eandem laxantibus deprehenditur ; qualis tum succus in subjectis mobili bile gaudentibus facile motum nimium , & naturæ quodammodo inimicum suscipere potest. Quod quidem in hujusmodi complexionibus , quarum sanguinis pariter , & spirituum mobilis erit constitutio , & in quibus tenerior sæpe jungetur ipsarum partium textura , ab animi aliquo affectu , aliisque de causis moventibus externis itidem evenire posse , nemo negaverit. Et respexit procul dubio huc sæpius laudatus Thonerus , quando Camphoræ noxam in calidiorem capitis constitutionem , nonnullis fœminis peculiarem , cerebrumque earum imbecillius rejicit ; ceu loc. th. 10. cit. videre est.



## XIX.

Restat, ut de tertia Idiosyncrasiarum specie, & primò iterum de illis, qui functione quadam corporis aucta laborant, paucis agamus. Occurrunt hîc primum illi, in quibus nutritionis opus justo liberalius procedit. Quorum ratio ut patefiat, monendum ex Physiologicis est, humorem corpus nostrum nutriendum, singulisque ejusdem partibus temperiem suam conservantem esse sanguinem. Sanguis igitur prout erit constitutus, pro eo etiam constitutum erit corpus. Quod si igitur in subjectis quibusdam partibus modò nutritivis modò pinguibus & adiposis sanguis abundet, & præterea (concurrunt enim interdum hæ causæ) partes ipsæ molliores, & magis laxæ existant, augeri inde nutritionem, & modò carnositatem, modò obesitatem in iis nimiam produci, mirum non est, præsertim cum in iisdem firmum organorum chylicantium robur, & laudabile suppeditatum alimentum causas antecedentes agant. Et sic se res habet in cæteris. Pro-ut enim serositatibus multis redundat sanguis, pro eo etiam major lactis copia in fœminarum mammis colligetur: siquidem è sanguine, & hujus quidem serosa parte albicantem hunc prodire liquorem, nemo, qui ex candido chylo purpureum sanguinem fieri concedit, tantopere mirabitur. Et quid denique mirum, eundem sanguinem, si in sexu hoc naturali copia laboret, menstruationem ipsam modò immodicam, vel perennem, modo ratione ætatis præmaturam, vel magis diuturnam reddere? Servat sanè rerum genitrix natura hunc morem perpetuò, ut quod nimium, sibi que inimicum sentit, per convenientia loca expellat.



In foeminis itaque cum mensium fluxus commodam præbeat evacuationis occasionem & viam, per hanc sanguinem deplere, molemque suam deponere amat. Et planè nobiscum sentit insignis Casuista Timæus à Guldenkl. dum loc. th. ii. circa hanc rem adductis non solum foeminam ad 76. ætatis annum menstruatam à constitutione sanguinea describit, sed eundem etiam menstruum fluxum undecimo ætatis anno erumpentem ad peculiarem potius puellæ complexionem refert, *quæ, ut loquitur Vir doctissimus, adeò maturè tantum sanguinis producit, ut in nutritionem corporis totus absumi non possit, unde tanquam superfluus, ne naturæ oneri sit, menstruatim excernitur.* Id, quod etiam in aliis ab Hercule Saxonia, Fernelio, Schenkio, aliisque observatum ibidem legitur.

## XX.

Quod functiones in aliis contra imminutas, vel abolitas, & speciatim illos, qui à corpore excernenda diutius, vel planè retinent, concernit, videntur partim à consuetudine hæc procedere, quâ nonnulli, parum interdum humidi assumentes, & partium, cavitationumq; , à quibus excretio fieri debebat, minori sensibilitate & hebetiori, crassiorique forsân bile naturâ præditi, excernendorum stimulum præterire sinunt, & sic longiori eorundem retentioni assuescunt : partim etiam inde, quod quædam in corpore nostro retineri videantur, quæ tamen per alias, easque insolitas vias excernuntur. Sic æstatis tempore urinæ excretio imminuitur, quæ tamen sudore copiosius tum fluente compensatur. Sic in foeminis menstruus interdum fluxus per uterum non contingit, quem tamen per  
alia



alia tum, eaque insolitissima loca cum euphoria procedere, Practicis cognitissimum est. Estò igitur, incertis subjectis per nares, & ductus salivales M. S. non depurari: necesse tamen erit, humores excernendi aliam affectent viam, per quam sine notabili adeò sanitatis detrimento à corpore secedant: quemadmodum idcirco gutturis viam in Medico illo Milhavenfi retentum sputum occupasse, qui propterea rarò sitim perpeffus, loquelæ autem quadam difficultate laboravit, Borellus l. c. existimat. Sed diximus & de iis, qui in ingestione deficiunt: ubi quidem ad rationem eorum, à quibus pilularum deglutitio fieri nequit, explicandam, id potissimum considerandum videtur, licet animalis actio deglutitio nostra sit, subesse tamen functioni huic aliquid naturale, & voluntati nostræ non obediens: unde fit, ut conceptâ præ re assumenda nauseâ, pharynx pertinaciter in hīs se constringat, qui tum, etiamsi toto animo deglutitio tentetur, & lingua oblatum sibi medicamen protrudat, constrictus manet, idque nullo modo admittit, id, quod in ingrato catapotiorum pharmacorum potissimum usu venire, mirum non est. Quod verò de abstinentibus, & iis quidem, qui à potu vel solito diutius, vel planè abstinuere, porò diximus, id vel temperamento horum humido, & pituitoso, vel consuetæ vivendi rationi adscribendum cum Quercetano arbitramur; qui ultimum illud exemplis hydropicorum probat, quos per diutinam à potulentis abstinentiam affectu suo liberatos nunquam dein liquidis uti voluisse constat, de quo vid. in Diæt. Polyhist. Sect. 2. c. 4. de cib. & Pot. Sed aliud fortè dicendum de iis, qui citra omnem cibi, potusque usum vitam



vitam protraxerunt, & quos verè idcirco abstinentes, five ἀσπίγς vocare licuit. Videtur fanè optimè rationem horum exposuisse Pechlinus, cujus proin elegantem hac de re locum, quem habet in Medit. sua de aer. & aliment. defect. c. ult. huc transcribere, operæ præ-tium duximus. *Corpus nostrum, inquit ille, indies aliquid amittit sui, modò plus modò minus: Si enim plus accedit quam amittitur, incrassatur, si minus, gracilescit; quod si ex æquilibrio tot adjiciuntur particulae, quot dispereunt, est proportio quædam status, atque habitus corporei. Illa dissolutio particularum corporis proximè à fluido subtiliore oritur, externo, vel interno. De externo quidem nemo facile concesserit, illud adeò nonnullis propitium esse, ut nihil deterat corpori, aliis contra tam inimicum, ut omne ferè resolvat. Fieri tamen posse arbitror, ut superficies corporum densitate sua, & arctiore contextu fluidi ambientis motibus aliquantum resistat, & sic humida quoque jacturam patiantur minorem. Quod facilius credo, cum corpora nonnulla quoad externam cutem etiam in subterraneis, & nitrosis cryptis post mortem diutissimè intemerata mansisse, certissimum habeam. Internum verò fluidum, caloris vehiculum, plurimum etiam valere constat in particulis corporis dissipandis: nam prout obliquè in solidiora impellitur, salis acumine quasi pyramidali comitatum, etiam solidiora profligat, potissimum verò humida, quod illa facilius à centro abeant, & caloris motui obsequantur. Illud itaque calidum ex naturali temperamento tam viscosis contineri particulis potest, adeò solida quoque ipsa visco, seu tegumento obduci, ut effectus ille insultantium particularum valde sit obscurus, & ad permolendum minus efficax. Quia tamen*  
necesse



*neceſſe eſt, aliquas partes diſperire, crediderim, non tam crasſiores iſtas, quam tenues & aquoſas extra corporis ſphæram protrudi; atqui illas, cum pabulum ex aere habere poſſint, non mirum eſt inde inſtaurari: Quin & ſpirituosæ, quas ſuper-eſſe adhuc dum muſcularis motus oſtendit, illæ quoque aeri, tanquam corpori foeto & tur-gido, conſervationem ſui debebunt; adeoque, cum nulla ſit ſolidorum ſive appetentia ſeu egeſtas, utpote quæ mi-nus ſunt diſſipabilia, ſequitur, aere ſolo & corporis conte-xtu proprio ſuſtineri aliquamdiu vitam poſſe, imprimis, ſi humido ſubinde interpolentur. Haſtenus ille! qui quo-modo & conſuetudine inedia poſſit introduci, eruditè porrò explicat, ubi de religioſorum & nautarum abſtinentia agit. Vid. Quercetanus. Diæt. Polyh. ſect. 2. c. 4. & qui tamen merè morboſam hic agnoſcit cauſam, Thonerus l. 3. Obſerv. de faſtid. cib. c. 6. Tan-dem, quod frigidam narium intemperiem, in certa familia ab Henr. ab Heer. obſervatam attinet, licet nul-lam ejus cauſam Autor afferat, verosimile tamen eſt, nonniſi à peculiari dictarum partium conformatione, quæ debitum ſanguinis & ſpirituum influxum, cumq; eo incaleſcentiam impedivit, eandem promanâſſe.*

## XXI.

Et ut de iis quoque, in quibus certa corporis fun-ctio depravatur, pauca ſubjungamus, pertinet huc, quod de illis, qui cibum ruminatum ventriculo com-modius concoquendum reddiderunt, adduximus; de quibus Vid. Joh. Rhodius Cent. 2. O. 59. Sed in promptu magis illarū fœminarum erit ratio, quibus per inſolita loca menſtrua proceſſerunt. Cum enim in his ordina-ria per uterum via obſtructa fuerit, clauſa, atque im-pervia, quid mirum, ſi humor menſtruus, effluxu



sibi per hanc partem denegato, alias, easque remotissimas sæpe quæsit vias, iisque ceu commodioribus assuevit? quod quidem in hujusmodi corporibus, in quibus laudabilis alias sanguinis constitutio, & firmum extitit organorum robur, tum fieri utique necessum fuit. Sed ad eos tandem, quorum effluvia damna aliis inferunt, festino. Certum utique id, & extra omnem dubitationis aleam positum, prout cujusvis hominis temperamentum, quod in sanguinis & spirituum animalium debita qualitate & influxu locamus, est constitutum, pro eo etiam esse constitutas excretiones, easque vel sensibiles, quæ per sudorem, urinam &c. vel insensibiles, quæ per insensibilem, quæ vocatur, diapnoen contingunt. Quod si igitur sanguis vitium aliquod contraxerit, & vel acrimonia vel alia quadam peregrina qualitate peccet, quid mirum, in excretionibus quoque, per quas natura heterogeneum excludere nititur, labem talem sese exferere? Et sic insolitis quidem planè accensendum, quod ex Avicenna de puella narravimus, illam omnes sibi appropinquantes interemisse: quod si tamen illius nutritionem, ab incunabilis usque venenis peractam, consideramus, ex nutritione illa venenatum provenisse sanguinem, ex venenato sanguine venenata prodiisse corporis effluvia, quæ aliis veneno non assuetis attulerint vitæ periculum, dicendum erit. Quemadmodum & fortassis illud, quod de quorundam hominum præsentia, tam hominibus, quàm brutis, aliisque rebus noxia referunt Autores, nonnisi à peculiari sanguinis in talibus subjectis dyscrasia, unde effluvia quoque talem malignitatem induerunt, deducendum venit. Ut autem peregrinorum temperamentorum peregrini-



regrina erunt effluvia ; sic contra dantur alii, quorum maximè naturalis est sanguinis, & spirituum temperies, quorum proin blandæ, saltem nemini molestæ erunt egestiones. Atque sic Alexandrum M. Heroicam suam mentem in optima custodivisse corporis dispositione, probabile est ; unde & sudore ejus odorem suavissimum spirâsse fertur. Sed aliter forsan explicanda Regum illorum, quorum non solum meminit antiquitas, sed quibus hodieque singularis in sanandis strumis efficacia adscribitur, proprietas. Licet enim ab individuali, & certis quibusdam familiis propria corporum temperie illam pariter deducere quidam velint ; malim tamen moralem hic simul agnoscere causam, dicendo, conceptam præ Regia majestate reverentiam, & ortam hinc spirituum in humores peccantes dein agentium excitationem multum, si qua hic fiunt, efficere posse, ne dicam, totam implere paginam. Miri enim sæpe sunt affectuum animi effectus, nec in creandis solum, sed & in fugandis morbis parva eorum efficacia deprehenditur : id, quod vel unico, ubi centum possem adducere, podagricorum quorundam, & arthriticorum exemplo patet, qui subito magnoque metu correpti, interdum & ira commoti, subito, & in instanti doloribus suis liberati sunt ; ceu variæ variorum scriptorum observationes id abundè confirmant. Atque hæc de causis Idiosyncrasiarum, quantum potissimas earum attinet species, dicta sufficiant.

## XXII.

Procedimus ad ipsum nunc potius considerationis hujus usum. Ubi prima quidem fronte hæc quaestio sese offert, an dictæ Idiosyncrasiae curam sui ad-



mittant, nec ne ? Sanè de illis , quæ in utero materno statim gignuntur, & à prima nativitate ortum habent, id nemo dixerit, esse curabiles. Quis enim vel Podalirius, aut Machaon illud dabit rectum , quod natura incurvavit ; aut illa flectet, quæ natura in longum duxit ? Unde ad rem & ex vero Jos. Quercetanus loquitur, quando in Diæt. Polyh. Sect. 1. c. de Timor. ita dicit : *At naturæ sunt quædam , & peculiares hominum proprietates , quæ à Natura Dei dicuntur , quibus hoc , vel illud citra apertam causam odimus , & metuimus , etsi ab eo nihil incommodi pati possimus : atque bujusmodi naturales affectiones nullam curationem sui admittunt.* Sunt tamen & aliæ Idiosyncrasie , non tam naturæ , quam consuetudinis vitio inductæ ; quales certè, si recentior consuetudo fuerit , per contrariam assuefactionem sæpe licebit corrigere : quemadmodum hinc illam strabismi speciem, quam infantes sola interdum oculorum in cunis contorsione contrahunt , contraria musculorum ophthalmicorum consuetudine curari videmus. Sed si inveterata consuetudo fuerit , si altas nimium jam in corpore egerit radices , aut si , quod vulgò dici solet , in alteram nunc transferit naturam , quid aliud dicendum , quam & constitutiones tali consuetudine illatas vix ac ne vix quidem emendari ? Et videntur his obnoxii potius illi Genuensi similes, qui , cum ob delictum ad ergastula nautica condemnatus , durissimos ibi per 25. annos exercuisset labores, libertati tandem à Principe Doria restitutus , eam grato quidem animo accepit , sed mox ejusdem pertæsus rediit , & in pristinam iterum , cui assuetus erat , servitutem se ablegari petiit. *Est enim magna consuetudinis vis, quæ post-*



*postquam semel invaluit, peregrina quæque ut solita ob-*  
*jectat, omnia per unam illam leviter accepta, quantum*  
*vis alias dura; ut scite loquitur laudatus Pechlinus in*  
*medit. de aer. & alim. defect. c. ult.*

### XXIII.

Sed quæ tandem contemplationis hujus utilitas? An, quod plurimarum sic Idiosyncrasiarum nulla est medela, earum propterea cognitio usu destituitur? Plane non. Est enim vel hic usus longè maximus, imò insignis; potestque statui duplex, unus Prognosticus, Curatorius alter. Quod Prognosticum attinet, in eo hic consistit, ut si quod naturale vitium in ægroto deprehendamus, id, etiam si per se malum sit, pro adeò malo non pronunciemus. Fuit tale vitium in duobus fratribus causone correptis nasus frigans, qui propterea, utut Medici mortis dederint prognosticon, ambo evaserunt, teste Henr. ab Heer. l. sæpius cit. Et quid in excretionibus sive alvinis, sive uterinis non contingit? Videmus fanè, excitari in nonnullis diarrhœas, enormes sæpe, & aliis citra magnum virium dispendium non sufferendas; sed his in bonum. Videmus, experiri fœminas immoderatiorem mensium fluxum; sed in salutem omnia. In talibus ergò malas exclamare has excretiones velle, quid esset aliud, quam nobilissimam prædicendi Artem prostituere? ex qua insigne contra sibi decus comparabit, quicumque Idiosyncrasiarum rationem habet. Atque hæc ipsius divini senis mens est, quando aph. 23. l. i. ita loquitur: τὰ χωρέοντα μὴ τῷ πλήθει τεκμαίρεσθαι, ἀλλ' ὡς αἱ χωρεῖν οἶα δει, καὶ φέρεי εὐφώρας. Scilicet fuit hinc usitata illa inter morbos congruos, & non congruos distinctio, quæ



usum certè in prognosi maximum habet, adeò, ut testibus modò laudato Hippocrate, & qui in illum commentati sunt, Valefio, Ludov. Dureto, & P. Salio Diverfo, proprios morbos facilius curari quàm alienos, una ex præcipuis prædictionum regula sit. Hinc enim est, quod serosi catharrhis, quod biliosi diarrhœis & febribus ardentibus, quod alii aliis morbis facilius tententur, quorum tamen eventum in his non ita timemus, quam si iidem morbi in alia subjecta, natura ad morbos tales non ita disposita incidant. Taceo, & ratione ætatis magnam occurrere differentiam. Unde, ut & hoc subjungam, utut pro malo vulgo habeatur pulsus intermittens, docet tamen experientia, non in senibus tantum citra morbum eum accidere, sed etiam juvenibus quibusdam eundem esse ordinarium, ceu Willisius Pharmac. rational. part. i. pag. 278. id inculcat: possemque propriam hac in re allegare experientiam, dum in puero 6. circiter annorum, in quo laboriosa admodum contingebat variolarum proruptio, qui tamen divinâ aspirante gratia feliciter convalescebat, talem non semel observare mihi licuit.

#### XXIV.

Ast latè pariter patet usus curatorius. Quod si enim in curis ægrotantium ulla res, certe propria cuiusvis corporis temperies, sive *ἰδιοσυμμετρία* probè venit ponderanda: utpote quæ, ut jam diximus, medendi methodum sæpe variat, & ab arte interdum recedere artis peritum docet. Manet siquidem natura dux optima, nec facile errat, qui illius genio sese accommodat: utque hanc sequentibus omnia facilia, & expedita sunt, sic contra illam, scite scribente Seneca, viventibus



tibus non alia vita est, quam contra aquam navigantibus. Ceu naturali igitur quorundam appetitui interdum aliquid largiendum; sic vitanda contra studiosè, quæcunque vel visu, vel auditu, potissimum autem, quæ odore, vel sapore ægris nostris adversa esse novimus. Vitanda sæpius camphorata, utpote multis exsequiori sexu subjectis inimica, & substituenda talia, quorum gratior, saltem non molestus ægrotanti odor est. Quemadmodum proin nec moschata aut ambrata omnibus adhibenda; cum, teste experientiâ, multæ præsertim fœminæ illorum usum non ferant, sed in cephalalgias, vigilias, uterinas passiones hinc incidant. Ut adeoq; sit reprehendendus hîc illorû Pharmacopæorum mos, qui in eodem sæpe scrinio, in eadem capsula, lapidem Bezoar, & alia pretiosa, & moschum quoque, & ambram asservant: manifestè enim lapidem Bezoardicum ex tali capsulâ desumptum & exhibitum nocuisse, constat. Quod si porrò decumbenti suo rosas bellum indixisse cognoscat Medicus, rosaceorum applicationem intermittat, & commodiora seligat, imò, quantum in se est, à frequenti balsamorum & oleorum fragrantium inunctione sibi caveat, memor illius, Medicum bene olere, si nihil oleat. Quamvis & interdum, quod in hystericis mulieribus passim observatum, arrideant suaveolentia, fastidio sint graveolentia: cui proin ægrotantium genio ubique se accommodasse, operæ pretium erit. Memorabilis certè, & ad probandam thesin abundè faciens est historia, quam Galenus de excellenti ex Peripatheticorum ordine Philosopho recenset: huic enim morbo certo laboranti Medici potum frigidum suadebant; sed renuit ille potum, regerens,



regerens , certo certius hac ratione sibi detrimentum allatum iri , & novisse se aliquot similis planè constitutionis , & temperamenti , qui hausto frigido potu perierint ; sed neglectis his Peripatetici argumentis æger gelidum cogeatur assumere , qui tamen vix unico evacuato vitro tetris corripitur convulsionibus , & ad plures ablegatur . Patet sanè hinc , quam malè suis ægris consulant , qui nulla ipsorum Idiosyncrasiæ ratione habitâ pressè suæ medendi methodo inhærent , & quantum sit , invitâ ac repugnante naturâ aliquid hic moliri . Agit quidem & naturæ interdum rectorem Medicus ; sed ut plurimum ejus etiam minister audit , cui incumbit præeuntis sibi ducis motum sollicitè observare , & quo vergat optima hæc morborum medicatrix , curiosius dispicere , nihilque agere , quod eam in ægri salutem aliquid molientem ullo modo turbet , aut impediat . Placet hîc , cum multorum possem afferre , unius Thoneri , Practici certè exercitatisimi & felicissimi , subnectere suffragium , qui annorum 64 experientiâ edoctus Obs. suarum l. i. de febr. contin. p. 33. juniores præsertim Medicos ita alloquitur . *Id junioribus , inquit , seriò observandum inculco , ut in sua Praxi , præsertim in delicatioribus naturis , & sexu fœmineo , abstineant ab iis , quæ odore vel sapore irritare ac offendere queant ; atque id cognoscere licet diligenti cujusque ægri naturæ disquisitione instituta . Et porrò eod. libr. de febr. interm. p. 73. ita scribit : oportet Medicum esse catum & cautum in præscribendis remediis , prius diligenter perscrutando cujusque naturam , prout per facultates humanas licet .*



Luculentius autem pateſcet contemplationis hujus utilitas, ſi magnam porro conſideremus, quæ in alterandis corporibus occurrit, differentiam; dum alii facile, alii contra difficillime aſſumtorum vires experiuntur: cujus proin exacta cognitio in molienda imprimis catharſi tutiſſimam Medico facem præferet. Cum enim ſint, qui ſtriſſam nimis, valdeque immorigeram habent alvum, nonne illa hinc fluit regula, non ſemper in lenioribus purgantibus ſubſiſtendum, ſed interdum ad fortiora, imò fortiſſima procedendum? Fateor, Sennatta, paſſulata, tamarindinata, & id genus alia benigna in plurimis ſubjectis præſtanda feliciter exequi, & hinc modo non ubique præferenda: parum tamen in aliis hîc ſæpe efficeremus, niſi ſcammoniata, helleborata, & id genus validiora ad manum eſſent. Rotundus interdum, quod dici ſolet, malo nodo quærendus eſt cuneus: & , ut juxta Coi regulam, l. de loc. in hom. 55. morbis debilibus pharmacis non fortibus, ſed fortibus, fortioribus utendum; ſic ſubjectis quidem debilibus debilia, fortiora verò fortibus hic pariter conveniunt. Pro ratione corporum igitur hæc quoque ſeligenda, & juſta præſertim doſi ægrotanti propinanda. Certè non tam in aliorum remediorum, quam in determinanda purgantium doſi error facilis eſt: in quantum peccare non ſemper eſt doſin ſupergredi, ſed & infra eam ſubſiſtendo peccare poſſumus. Neque enim hic idem de purgantibus propriè dictis valet, quod de vomitoriis Antimoniatis alias notum eſt; illa ſcilicet, etiamſi ſenſibiliter non operentur, magnam tamen vel inſenſibiliter corpus humore morboſo liberando præſtare utilitatem. Aliter longè comparatum eſt cum purgantibus, utpote quæ, ſi minori doſi exhibeantur, ut ſubſiſtant, præter tormina, & cruciatuſ, quos ægro excitant, indelebile quoque ſæpe vitium humoribus inducunt; id, quod Gregor. Horſtius Cas. Chir.



Obs. 26. notabili exemplo confirmat. Temerarium alias & culpandæ audaciæ plenissimum illud fuit tentamen, quo empiricus quidam asciticum, variis jam remediis in casum tractatum, sequenti pulvere restituit:  $\mathcal{R}$ . Tartar. Vitriol.  $\mathfrak{z}$ ij Gum. Gutt.  $\mathfrak{z}$ ij. Rad. Gialap. el.  $\mathfrak{z}$ ij. Sal. Vitriol. alb.  $\mathfrak{z}$ ss. fol. aur. nò 3. M. F. pulv. quem cum patiens simul, & semel ex cerevisia calida sumfisset, & ingentem humoris serosi copiam plus centum dejectionibus per biduum excrevisset, nullo alio adhibito medicamento brevi convaluit; ut videre est apud Timæum à Guldenk. l. 3. Obs. cas. 25. Quod licet ex Arte proscribendum, & nulli rationali Medico imitandum sit experimentum; patet tamen vel hinc, quantum inter corpora purgantibus sollicitanda sit discrimen; dum multa levibus quidem expugnari possunt præfidiis, ubi contra alia robur quasi, & æs triplex medicamentorum efficaciam opponunt. Non nimis ergò hic timidum esse decet; sed si in uno, vel altero ferreæ ejusmodi naturæ nobis occurrant, fortiora etiam, & subjectis adæquata pharmaca advocanda. Atque sic non tutò saltem, sed & cito pariter, ac jucundè sæpe curatio absolvitur. Id, quod varia celeberrimorum Practicorum monumenta abundè testantur: inter quos unum Thonerum iterum memorasse sufficiat, qui virgini Göppingensi, diu de alvi duritie conquestæ, & aliorum Medicorum præscriptis in casum tractatæ, sequentes pilulas ex voto cedentes ordinavit,  $\mathcal{R}$ . Extr. panchym. Croll.  $\mathfrak{z}$ ij Extr. pilul. coch.  $\mathfrak{z}$ i Essent. Scammon. gr. Vij. c. aq. Meliss. f. pilul. nò is, ceu in append. Observ. de vario purg. gen. id recenset.

## XXVI.

Sed cum non omnes robustis ejusmodi lateribus sint præditi, sed alii temperamenti planè diversi & delicatioris naturæ obveniant; graviter contra ab hac parte, si drasticis medicamentis hæc corpora tractare velis, peccari posse nemo non videt. Scilicet, dari eorum plurimos, quibus nullo fere



ferè negotio alvum movere liceat, per causas modò allatas cognovimus; nec quotidiana hîc experientia exemplis destituitur. Exhibere autem his & similibus fortiora purgantia, quid esset aliud, quam magnum in iis excitare humorum motum, vires citra necessitatem perdere, & immaturam, imò repentinam sæpe ægrotanti mortem inducere? Neque enim, quod nonnulli existimant, illa, quæ per drastica ejusmodi educuntur, talia semper in corpore fuerunt, sed talia potius fiunt, cum certum sit, nimia eorundem operatione humores laudabiles quoque liquefcere, ferefcere, corrumpi, fœtorem nancisci, imò indelebile, nec ullis dein Artis præfidiis corrigendum vitium suscipere. Id quod Medicinæ ille Candidatus, Monspeliî degens, suo damno expertus, qui, cum pingui satis habitu, plenoq; vultu incederet, cathartico quodam à Professore ejusdem loci propinato hypercatharsin tantam incurrit, ut secutis octoginta circiter dejectionibus maciem exin nunquam iterum emendandam contraxerit; ceu Borellus Obs. cent. 2. hist. 64, ex ipsius Medici relatione hoc annotat. Scilicet, ut fortiora fortibus, sic contra iterum mollioribus his evacuantia conducunt leniora, talia nempe, quæ materiam quidem in his peccantem commodè excludant, interim non majores motus, quam pro eliminando noxio opus erat, excitent. Ut bene illi Medicis præsertim junioribus consulant, qui, quotiescunq; morbi id fert conditio, semper à blandioribus purgantibus incipiendum, & successivè demum ad fortiora progrediendum esse docent. Atque sic procedendo doctissimus Sylvius triginta illis, & pluribus, quibus Medicinam fecit, annis nunquam se hypercatharsin movisse gloriatur. Et, quod si celeberrimorum Practicorum auctoritates hîc dispicio, lenioribus evacuantibus eos omnes ferè delectatos, & invitos ad fortissimorum usum ascendisse deprehendo. Equidem, quod Veteres concernit, eos levioribus purgantibus planè caruisse,



vulgaris quorundam opinio est. Attamen & his, si non secundum omnem materiam, saltem secundum methodum & cognita eadem, & probata fuisse, in eximia de len. med. exim. usu differt. egregiè edisserit Excellentissimus Meibomius Artis & Doctrinæ Decus, Præceptor meus ætatem suspiciendus. Qui quidem benignis utendi ritus progressu temporis magis, magisque invaluit, adeò, ut saniores hætenus ubiq; Practici eundem, ceu firmæ experientiæ innixum, fuerint amplexi. Sic familiaris Juliæ nostræ ornamento Cl. Conringio erat pulvis, qui habebat crySTALL. Tart. ʒij Resin. Gi. alap. gr. ij, quo feliciter in curanda Sueciæ Regina utebatur; ceu patet ex consilio ejus Epist. Tim. à Guld. l. 3. inserto. Et quantum præstiterit passulis suis minoribus, uti & prunis laxativis Thonerus, ex observat. Ejus l. 2. ubi pro referenda alvo mirè illa deprædicat, fatis liquet. Ut plurimum exempla, quæ in promptu alias essent, nunc non adducam. Viderunt quippe Viri præstantissimi, levibus ut plurimum in statu suo naturali conservari, & ad eum reduci posse corpus; unde, quod facili præstari potuit operâ, id magno agere apparatu, supervacaneum, imò noxium duxerunt. Quemadmodum idcirco pessimus ille empiricorum, agyrtarum, balneatorum, & id genus medicastrorum mos est, qui nullâ habitâ subjecti ratione fortissima sua, & firmis solummodo lateribus applicanda drastica propinant, hoc ipso demum felices, quod prosperos eorum successus sol aspiciat, adversos, quorum longè maximus sic erit numerus, terra tegat. Verum enim verò si considerarent, qui hujus sunt farinæ homines, quantum sic procedendo & ægrotanti damnum, & conscientiæ suæ offendiculum præberent, methodum hanc in generis humani perniciem natam facile defererent, & intra officii sibi demandati limites lubentes se continerent. Non de lignis hîc, aut lapidibus, sed de humano luditur corio, humano inquam, quod sapientissimus Conditor exa-

Etissi-



Etissimum bonitatis, & omnipotentiae suae speculum esse vo-  
 luit, quod proin, qui temerè corrumpit, næ gravem is ali-  
 quando, nisi resipuerit, delicti poenam luet. Et manet ve-  
 rum, non aliorum magis, quam evacuantium medicamen-  
 torum usu evidentem corpori humano posse creari noxam.  
 Unde Willisius Pharm. rat. part. 1. p. 99. sollicitè adeò mo-  
 net, ut quisquis vivere, & sanitatem retinere cupit, empiri-  
 cos cum suis ut plurimum mercurio, elaterio, similibusque  
 paratis drastis cane pejus & angue devitet. Quemadmo-  
 dum experientissimus pariter Thonerus in perniciosum hoc  
 hominum genus acerbè invehitur, quando eleganti simul si-  
 mili illa exigua quidem dosi ingesta, ast mox *ἀνω καὶ κάτω*  
 violentiam suam exferentia purgantia cum Ichneumone  
 comparat, mure scilicet Indico, qui ob insitam cum croco-  
 dilo antipathiam in ejus ad littus maris apricantis & hiantis  
 rictu dormientis fauces placidè se insinuare, & ventrem mox  
 perforare dicitur; ceu hæc legi possunt lib. Ejus 6. ep. 26. Ut  
 prudentissimè idcirco à Magistratu prospectum Italiae sit, u-  
 bi in singulis ferè civitatibus loco publico affixæ conspici-  
 untur tabulae, cum inscriptione: *Nomina Medicorum, qui-  
 bus licitum in hac urbe purgantia præscribere*; ceu Timæus à  
 Guldenk. Obs. 13. cas. 16. id refert. *Magna enim, ut ejusdem  
 Timæi verbis finiam, in molienda catharsi opus est cautione,  
 etiam doctis interdum non satis expedita.*

## XXVII.

Quod de purgantibus propriè dictis sic adduximus, id  
 de aliis etiam evacuantium generibus suo modo verum e-  
 rit. Obtinet id in emeticis quoque; quorum cum *ἐμπύρετα*  
 etiam, sed certo effectū non destituta dentur, hæc sanè tan-  
 quam tutiora in multis subjectis fortioribus anteponenda.  
 Obtinet id in sudoriferis; in quorum applicatione id utique  
 sollicitè inquirendum, an non fixa præstent volatilibus? Lu-  
 bens equidem id confiteor, magnam volatilibus inesse pe-  
 netran-



netrandi vim, magnam malignum quoddam è sanguine expellendi efficaciam. Interim cum sint, qui pessimè eorundem usum ferunt, id, quod camphoræ exemplo declaravimus, his penetrantia talia, & activa applicare velle, quid esset aliud, quam ægrotantis damna intendere, &, quod dici solet, oleum igni admovere? Fixa igitur in his ubique præferenda volatilibus; utpote quorū diligenti usu citra magnam humorum commotionem, citra calorem, & symptomatum exacerbationem id pariter obtinetur, quod ab aliis expectare poteras. Taceo, ratione ipsius morbi sæpe non convenire volatilia, ubi verò fixa rem totam absolvunt. Et sic vulgaria illa quidem, sed longo usu comprobata, Carduum benedictum, Rob Sambuci, oculos cancri, cornu cervi, mandib. luc. pisc. & id genus alia, excellentissimis Practicis inter arcana esse video. Quam quidem cautelam de diureticis etiam remediis, quorum alia violentius stimulant, alia abstergendo tantum agunt, &, quod aquo sitate sua urinam proliciant, tutiora observantur, notasse operæ pretium erit. Vid. supra citata Cl. Dn. Meibomii de lenior. med. exim. us. dissert. ubi & de fortioribus & acrioribus medicamentis externis non in quibusvis corporibus adhibendis salutare monitum annectitur.

#### XXIIV.

Nec illa tandem, quam de functionibus proposuimus, Idiosyncrasiarum contemplatio fructu suo destituitur. Emergit enim hinc celebris illa, & eximium in Arte usum habens Praxeos regula, Medicum spectatorem interdum agere rectius, quam actorem, & optimam sæpe, secundum divinum senem, Medicinam esse, nulla uti. Sit v. g. ut in expositum jam de evacuatione menstrua exemplum hæc applicemus, in Plethoricæ constitutionis fœmina immoderatiorem contingere, vel nimietate, vel diuturnitate, vel frequentia mensium fluxum. Quæritur, an fluxus ille curandus,



randus, an sibi relinquendus? Ubi quidem, si bene eum ferat mulier, nec nimium inde debilitetur, eum non attingere, quam intempestiva arte suppressere utique præstat: magna siquidem inter illam, quæ per uterum singulis mensibus excernitur, sanguinis copiam in mulieribus occurrit differentia, sic, ut quæ in nonnullis nimia audit, & Medicam exposcit opem, in aliis maximè naturalis sit, ac ordinaria, nequaquam proin Artis præfidiis impugnanda. Quemadmodum in cæteris etiam evacuationibus, diarrhœis sc. narium hæmorrhagiis, aliisque id pariter obtinet, in quibus non tam exeuntis humoris quantitas, quam euphoria venit respicienda: juxta recensitum jam Hippocr. aphor. l. i. 25. Cumque sint, qui imminutæ functionis respectu diutius in ediam naturaliter tolerant; hi ægrotantes ad cibum sumendum non nimium cogendi, sed sibi potius hac in parte relinquendi. Vulgatum quippe est illud; sobrietate, & abstinentia multi curantur morbi. Quod si ullibi verum, certè in hujusmodi subjectorum affectus id venit applicandum; in quibus nullis magnopere alimentis natura onerata materiam peccantem melius digerit, felicius consumit, & facilius exterminat. Atque sic Aurelium Imperatorem, aliosque, solâ abstinentiâ morbos suos abegisse constat. Tandem, quod & illos, in quibus functio quædam depravatur, concernit; præstat sanè hos, præsertim, si vel primus ortus, vel inveterata consuetudo vitium induxerit, non curare, quam curando se, artemque prostituere, &, quod dici solet, sine spe prædæ in scopulo morari. Neque enim natura hac in parte nostris cedit conatibus; quam si, quod in proverbio est, vel furca nitaris expellere, subinde tamen recurrere experientia testis est. Id, quod pluribus propterea non astruo, sed in eo, tanquam in re apud omnes in confesso posita, acquiesco.

## XXIX.

Patet tamen vel ex his, magnam esse corporum, quæ  
Medico



Medico tractanda obveniunt, differentiam, & propriam sanè ac plane peculiarem naturam, atque hanc proin, si salutarem sibi quis promittere velit eventum, in Arte facienda ubivis respiciendam. Quemadmodum enim alias, qui bene distinguit, bene docere dicitur; sic potissimum & hîc, qui individuas variorum ægrorum proprietates sollicitius distinguit, is rectè demum curat. Et valet hic quoque egregium illud, & nunquam satis in Praxi laudandum doctissimi Vallesii Judicium, quando meth.med. l.4. c.2. ita loquitur: *multa sunt in Arte Medica, in quibus urgentiæ causa ab arte recedere ars est. Nam cum sint in ea multa præcepta legitima, & regularia, perpetua tamen nulla sunt, & qui ulla habet pro perpetuis, & in violabilibus, methodicus dici potest, rationalis autem minimè. Nam rationalis non curat ex libello, aut commentario, sed ut in re qua vis exercitata ratio dicat, & nullis se legibus, tanquam pragmaticis obligat.*

Et sic claudo : fit hinc Gloria sola Deo!

---

**S**ic Medici sensim studii oblectamima sentis!  
Namque favet cœptis JULIA clara Tuis.  
Gratulor ex animo superatum ritè laborem;  
Propitiusque Deus sit Tibi porrò precor.  
Dirigat Is praxin! Crescet sic Gloria Jovæ,  
Robur & ægrotis, & Tibi firma salus.

*Hæc Fratri unico pietatis ergo  
apponere voluit*

Conrad Johann Kramer,  
S.S. Theol. Stud.